

定華小錄

213
4

南
琴
小
錄

七

...

這先

修室善美竹竹水月道場

觸着此哉惡辭

何嫌三思極迴

勢氣于揚于臨庭 三標聖德行儂

又修性性于信濟 四嶺主旅方竹

信于修宗願德望福回於東武滿

崎 育于千窮

持眉布垂共為洞海門打補陀山

下 浮為文鐵舟

列于信金禪 一髮牽千鈞


宜哉當法山家長

可謂有爾自然香

夫是得之鐵舟崗山負山大祥和

壽真

南禪三百七四世師松巖拜讚



列言

空華老師七十年來。應機接物。其八音四辯之外。以詩偈文章。舉揚綱

宗。啓示後學者。積爲數千之多焉。今某等各搜筐底。得其所曾筆錄者。


輯成一編。名曰空華小錄。此固雖知非老師之本意。師今茲明治三十

四年三月。會當其第七十七回誕辰。豈可無賀。乃上梓。以頌諸參徒之

間。一以酬老師之高德。一以備他年之遺忘而已。非敢欲公于世也。

一此書所錄者。既係各自筐底所藏。隨得隨錄。其序次錯雜。季節前後。則

以之也。若夫錄中片言隻字。莫所妄改竄。但恐匆卒之際。植字漫漶。檢



校闕精。尙不免無烏焉馬之謬。編者之罪大焉。乃期他日。重可更訂也。讀者幸諒焉。

一當編此書。得天澤文雅師石川文莊居士等贊助之力。乃錄于此。謹謝焉。

編者謹識

空華小錄目次

法語

佛事

讚

偈頌

詩文

行實

舊歲已去。新歲茲來。有不涉新舊底漢麼。參。

提綱

拈杖云元正啓祚。萬物咸新。春山疊青。春水漾碧。佛殿階前。四松鬱蒼。微笑塔前。寒梅馥郁。靈山密旨。示直指禪。正法眼藏。露太平象。且道。是何祥瑞。
卓拄杖一下曰四海盡歸皇化裏。三邊誰敢犯封疆。

自叙

恒上座

小垵之蟻。

未見泰山之高。

古井之蛙。

爭知東海之濶。

伏乞衆恕。

謝語

上堂之次

伏惟

管長要津大和尚

扶起禪風。

直續鵠林高躅。

釐正宗教。

盡歸百丈清規。

又伏惟

龍泉派下諸大和尚

具實性機。

袖藏龍泉寶劍。

傳大龜法。

肩披鷄嶺錦襪。

又伏惟

東海派下諸大和尚

熙々春光。

廣通東漸佛德。

肅々風彩。

大興日多心宗。

又伏惟

靈雲派下諸大和尚

圓滿寶珠。

本光遠輝天地。

大寂靈鑑。

清影常照乾坤。

又伏惟

聖澤派下諸大和尚

堂々大道。

山色即清淨身。

滾々眞源。

溪聲即廣長舌。

又伏惟

當山東堂和尚各位禪師

道高德高。

朝養丹田氣海。

詩熟禪熟。

暮吟明月清風。

次惟

玉鳳塔主各位長老禪師

仙園拈華。

翫臨濟三玄要。

梵宮獻茗。

弄趙州一味禪。

次惟

山門東西兩序。單寮蒙堂。前資辦事。一會海衆。諸位禪師。

季世英豪。

內存玲瓏機智。

後昆模範。

外露華藻文章。

拈提

拈拄杖云舉。世尊於靈山會上。拈一枝華。示衆。百萬人天皆罔措。獨有迦葉尊者。破顏微笑。世尊曰。我有正法眼藏。涅槃妙心。實相無相法門。附囑大迦葉矣。我花園上皇。詔大燈國師。朕將以花園離宮。改成梵刹。而令關山和尚住持。請預標記。國師書正法山妙心寺之號。進呈。大有故哉。國師標記事。光顯分明也。且道。與拈華微笑意。是同乎。是別乎。諸仁者。如何辨得。

也。于拈曰。世尊憐兒不識醜。迦葉家富小兒驕。法山與麼提持。畢竟作麼生。花開不假栽培力。自有春風管對伊。山野別綴拙偈。恭祝大年。諸大德。乞擊節。卓柱杖曰。袈裟無恙住花園。春滿妙心正法門。遠捧芙蓉千歲雪。須彌頂上謝皇恩。

孟春猶寒。伏惟。各々道體。起居萬福。久立珍重

冬夜小參

垂語

豎起拂子云。律管飛灰。繡紋添線。要看雲物。試登魯臺。參。

提綱

今宵群陰已去。渡香橋下冰生。炤明朝一陽挽回。鷄足嶺頭梅開。昏是衲僧家。發大機大用。底好時節也。洞山却菓。慈明揭榜。即暫置。法山今宵。攀亞歲例。同諸大德。喫黑豆茶。商量此事。擊拂曰。陰陽不到處。一片好風光。

自叙

恒上座

謾成野干鳴。猥污獅子座。

忸怩々々。

謝語

小參之次。

伏惟

管長要津大和尚

少林開五葉。

法山定要津。

又伏惟

龍泉派下諸大和尚

龍泉在手裡。

殺活得自由。

又伏惟

東海派下諸大和尚

東海日多識。

金波玉浪浩。

又伏惟

靈雲派下諸大和尚

靈雲蓋四維。

澍甘露法雨。

又伏惟

聖澤派下諸大和尚

聖澤流不盡。

一脉爲萬派。

次惟

當山東堂和尚禪師

握奪命神符。

張法窟爪牙。

次惟

玉鳳塔主各位長老禪師

玉鳳護仙宮。

金翅列丹墀。

次惟

山門東西兩序。單寮。蒙堂。前資。辦事。一會海衆。諸位禪師。

栴檀無雜樹。

獅子絕異蹤。

拈提

拈拄杖云。舉。大興真宗禪師。冬夜示衆曰。山僧門庭荒寒。今夜無菓子可辨置。惟有五祖鐵酸餡。楊歧栗棘蓬。不妨拈出供養諸人去也。莫下背底衲僧麼。禪師說話。痛着一鞭了也。法山今冬。建立雲堂。工匠日運斤斧。賴有木札羹鐵釘飯。撒向諸人。有齒底。子細咬嚼。無齒底。勿崑崙吞却。且道。與古人。是同乎。是別乎。卓拄杖云。月從雪後皆奇夜。天到梅邊有別春。

天寒。伏惟久立珍重。

退山上堂

垂語

禹門三月雪花翻。透網金鱗猶滯水。此中有化龍底漢麼。參。

提綱

拈拄杖云。識得拄杖子。一生參學事了也。何故。早拄杖一下云。行到水窮處。坐看雲起時。

自叙

恒上座

喚鐘作甕。

指鹿作馬。

鈍痴如斯。

衆慈昭亮。

謝語

上堂之次

伏惟

管長要津大和尚

匡正宗規

挽回佛道

又伏惟

四派各々諸大和尚

派分四流。

道高五岳。

又惟

東堂和尚各位禪師

宗門英靈。

保社模範。

又惟

玉鳳主塔各位長老禪師

玉回珠轉。

鳳出麟翽。

又惟

山門東西兩序。單寮。蒙堂。前資。辦事。一會大衆。諸位禪師。

輔敎典令。

補翼宗猷。

拈提

拈拄杖云。舉龍峰國師。崇福退山上堂曰。衲子從來無定跡。天涯海角任情遊。一毫頭上辭華洛。三鼓聲中出九州。國師凭麼一偈。可謂去住自由。脫着自在也。雖然。大小國師。只知途路遠。不覺又黃昏。勿言陣後說兵書。山野今日辭法山。雲無心出岫。鳥倦飛忘歸。畢竟與國師是同乎。是別乎。草拄杖一下曰。同不同。別不別。山野茲憑諸大老夾補住山。今打退鼓。臨別不堪感激之至。聊綴拙偈。以表分違。

住此名藍何勝緣。

法盟恩重足難前。

一條鐵路春三月。

拄杖龍飛富岳邊。

伏惟道體萬祉。久立珍重。

駿州大龍山臨濟寺晉山法語

安政五年十月十五日

晉山

滄沓秋色命懸絲。衣鉢傳來小尿兒。世出世間俱不奪。一拳々倒五須彌。

垂示提綱

法無常相。立處皆真。如何是無常相處。那箇是立處真底。

記得臨濟栽松次。黃檗問曰。深山裏栽許多。作什麼。濟云。一與山門作境界。二與後人作標榜道了。將鑿頭打地三下。檗曰。雖然如是。子已喫了吾三十棒也。濟又以鑿頭打地三下。作噓々聲。檗曰。吾宗到汝大興於世。好個商量。子細看來。黃檗爲賊過梯。臨濟家富小兒驕。新臨濟即不然。有人問着。拋向面前云。看。鑿頭無冷處。諸仁者。踈鑿底有麼。參問答略之

諸大德。各々龍吟虎嘯。予亦別語。

今有獨隔壁鈴動。富貴而不歸故鄉。着錦如夜行。久立珍重。

佛事

再住妙心白翁大和尚奠湯於長福寺

乾坤震動怒雷轟。底事阿師倒化城。洙水熬山何以報。香橙一盞淚縱橫。

恭惟 再住妙心當山準開山靈雲白翁大和尚。

戒珠雪白。道眼月明。

初參長汀禪。濟水深矣。三玄三要鉗鎚衲子。

後叩餐松窟。嵩山高兮。十重五位拘束後生。

東山領衆則。穿却混沌鼻孔。

南宗匡徒則。抹殺金剛眼睛。

花園住山。柏樹話頭。生擒賊機乃祖。

靈雲穩坐。桃花悟道。熱瞞不疑法兄。

在聖同聖在凡同凡。青山無限好。

逢佛殺佛。逢祖殺祖。黃河徹底清。

如上者。聽松老大師。生前遊戲底活三昧也。即今向火焰裏。轉大法輪。覆蔭後昆一句。如何露呈去矣。

錦屏夜々幽窓月。聽取松風聲外聲。

積翠院靖節柳蹊居士掩土俗稱吉田佐五。能畫花鳥。椿山彌門人。

一毫頭上寫山川。半片紙中容大千。五十餘年閑受用。風光多在水雲天。

夫以 積翠院靖節柳蹊居士。胸襟雪潔。晚節松堅。

李伯畫觀音。室中聲價。遍傳千歲後。

摩詰圖芭蕉。雪裡風流。尙在威音前。

或時擬陶靖節。訪惠遠社。

或時摹韓翰林。參大顛禪。

到這裡。

物物全真。

蘇公竹叩澗戶。

頭頭顯露。

戴嵩牛臥池邊。

快豁自在。

意氣凜然。

這箇者是柳蹊居士。生前受用底活機先也。臨行一句聽山僧敷宣。

江上晚來堪畫處。

蘆花夕上月輪圓。

贊

陸前增長寺東令東堂贊

橫拈如意。坐曲錄牀。久振正法於龜島。新築諸堂于增長。

別々欲識此翁真用處。東山號令海無量。咦。

不動明王贊

左纏右劍。屹立磐陀。衆生瞻禮。降伏諸魔。

前任龍泉中興仁國寶長老讚

咄箇一宿客。韜昧二十年。修補楊岐壁。鑿開百丈田。夙設救生會。放
蠢動山川。常唱觀音呪。結合靈勝緣。楚國無價寶。惟仁以獨傳。終
依諸老獎。嗣予靈雲禪。嗣子携遺像。來乞贊短篇。從來不傳道。何敢
上言詮。咦。將謂延年劍去久。寒光夜透斗牛邊。

駿州神龍院栢堂悅長老讚

咄這老漢。久住神龍。開畚播麥。剗荆栽松。參栢樹話。慕乃祖蹤。屢叩我室。終得綱宗。咦。金襴傳外傳何法。吞卻窓前八葉峰。

前往南禪梅嶺郁和尚大禪師贊

一生受用大梅禪。馥郁清香逼塞天。々々々兮沒蹤跡。春風影裡不傳々。恭惟 前南禪管長前城安梅嶺郁大禪師。戒光珠淨。定惠月圓。初於金剛寶山。達觀教海。後入鐵圍禪室。耕鋤心田。嗣單宗法。踏着百丈再參軌轍。佩餐松印。看破臨濟破夏因緣。大官擢任教正。一派仰統宗權。曾聘虎溪古道場。以病不起。却開浪華新法窟。選佛是專。九十九島遍掉慈航。七十七齡茲示終焉。咦。嗣子道溫力生。遙寄沒蹤老大師之真影。乞讚辭。予於老師。爲道法兄弟。誼不可辭。漫摭贅語。以塞其責。勿謂既落言詮。

偈頌

佛誕生會

雨後青山清淨身。百花爛燦映湖新。驀然吐出八龍水。洗盡娑婆來往塵。

佛涅槃

波旬舞欲界諸天。慶喜哀提河水淵。不識如來生也滅。臥容恰似漆園仙。

又

生非生矣滅非滅。端的如何說向人。強被鶴林知妙處。百花啼鳥不堪春。

又

遺經說了涅槃夕。雙樹林中春月寒。百萬人天無限淚。年々爲雨灑烟巒。

佛成道

雙肩巢鵲曾非佛。兩膝生蘆又不禪。欲見如來圓滿相。蓬頭垢面瘦如仙。

又

一見妖星雙眼豁。頻呼成道長無明。雪山雪矣提河水。洗到驢年又不清。

又

蓬頭垢面出山時。一見明星八刻遲。昨夜江南梅有信。清香薰徹五須彌。

又

王宮未出已成道。何事雪山嘗苦寒。誤被妖星穿眼底。果然大地黑漫漫。

初祖諱次上力韻

賺殺梁王兼魏主。分皮分髓太奇哉。野狐精魅未全脫。葱嶺果然携履回。

又

果然擔水賣河頭。衣冷梁江魏海秋。末後自從分骨髓。胡亂暗合又明投。

又

梁朝魏闕無知己。九白面牆坐少林。末後分皮分髓去。滿山黃葉止啼金。

關山諱次上方韻

室無長物風顛漢。話有賊機惡辣禪。要識國師真氣脉。看他東海日多禪。

聽松老師盡七日諱

人天慟哭淚成霖。七七忌辰昨已今。一片沈香無限怨。高山流水沒絃琴。

別々 欲問師兄真消息。月沈野水光明藏。蘭吐春山古佛心。

韜谷和尚追悼

金剛窟裏老師翁。遊戲神通西又東。靈鷲峰頭常在月。韜光忽入暮雲中。

悼遠州見性徒文陸上座

幾度推敲翰墨場。一朝告別沒商量。老來何事傷人意。獨向窓前吟舊章。

哭師父戡化

時臘月拾叁日。疾風暴雨。川壑等。

何事俄然倒法幢。山崩岸裂怒雷喧。胸中萬斛無限淚。爲雨作風塞駿江。

悼駿州松源豐宗座元

翻却松源黑豆禪。俄然此夕示終焉。尙留一點靈光在。月照圓山名地夜々

圓。

周山仙芳兩祖翁五十回忌

父子唱和同怨家。雲門胡餅趙州茶。諱辰五十餘霜曉。風冷芙蓉八月花。
長久象外大和尚廿七回忌

踏破漁巢與棘園。嘉州大象跨乾坤。追尋五丈原頭恨。二十七年雙眼昏。

作州佛土豐州東堂追悼

花園道契已三年。肝膽心腸似鐵堅。未唱凱歌何處去。恨深塞外出師天。

悼澤野恭巖居士

九十五年願此神。寫經拜佛避紅塵。放下諸緣底時節。示現金剛不壞身。

世父得芝。好俳諧。自稱曰西行堂。今茲安政丁巳年。正當其廿
參回忌。門人數名相謀建碑。鑄翁句曰。樣々爾唉多後遊八

重樓

國師用處強尋覓。潭北湘南露尾巴。知我先人塔樣別。一篇餘詠白櫻花。

遠州連福寺碧巖集會總供養

龍池山下宿龍池。天外影高無字碑。凡聖都來應供會。白蘋紅蓼雨晴時。

侍師父病牀二首

日面佛兮月面佛。強擊湯藥問尊容。夜來被喝死窠窟。兩耳忽成三日聾。

七年辛苦千般病。肉落骨瘦毛髮長。拈起胸中無字則。天崩地裂日光黃。

丹後文殊徒魯首座追悼

二十餘年鐵作肝。青雲志氣逼人寒。驀然燒却疏鈔去。學海波瀾一夜乾。

西藏寶山珉準東堂追悼

普化贊來臨濟禪。俄然先我上春天。卦盤放下底時節。八面來兮妙不傳。

別々 松間明月長如此。君也再遊知幾年。

駿州大岩富春院大春座元追悼

是聖是凡人不知。河南來說小厮兒。空中一夜鈴聲響。特地全身脫去時。
別々 來不來去不去。江月照松風吹。

養源南明和尚七回忌

密啓德山雷又驚。鰲峰雪夜喚師兄。芭蕉葉上七年雨。滴碎巖頭刃一聲。
師父五七日建無縫塔于善福寺

與一文乎與兩文。先師去後向誰分。今朝五七諱辰日。無縫團々疊亂雲。

餐松老大師十七回諱 於遠州連福寺拈香

憶着當年毛骨寒。喝雷棒雨徹心肝。吐哉要見先師面。月冷遠陽七十灘。
瑞龍砒霜老師追悼

提起砒霜狼毒禪。應緣六十有餘年。果然此老無多子。鵲眼鷹睛傳不傳。
等象齋佐田介石師追悼

生涯粉骨又摧身。佛曆臻師更一新。憂國憐民經濟說。此人去後更無人。

追悼鐵舟寺殿前宮內少輔從三位勳二等雲外高步大居士

毘耶城裏老維摩。扶起法門彈且呵。永訣俄然何處去。獨包紅淚臥癱痾。
別々 此君心地無人會。笑裏春風斬佛魔。

追悼慈德院月觀曉洲居士

參得餐松向上禪。施慈積德五十年。生平觀月弄花眼。照破無方清淨天。
別々 細雨濺花千點淚。淡雲籠竹一帶烟。

鐵舟寺殿三回諱木像新成於花園龍泉庵修齋

多年參得五家禪。書劔縱橫妙不傳。遺像新成三匝忌。眼睛突出破雲烟。

陸前福室西光寺授戒會滿散

娑婆即是寂光土。六凡四聖何處迷。甘露門開真實相。一聲黃鳥竹林西。

福地櫻癡居士爲其一族故舊先亡於天澤山設大施食

會請福田會會友。泊各宗大德。供齋。且饗育兒院兒童。歡喜之餘賦似。

甘露門開雨華新。存亡齊結幾勝因。仁慈啻到孤兒輩。普潤福田々裏人。
雲州松江天倫寺龍門夜話會滿散。依開山古鏡禪師偈韻

潤開甘露門。三有絕塵根。松江滿盆水。供養盡乾坤。

豆州入間海藏寺戒會晉山

路入青松白石間。瑞雲深擁是仙寰。海門春色無今古。柱杖頭邊日月閑。
丹後文殊智恩寺戒會晉山

登臨海上古精藍。六里天橋罩翠嵐。借問堂中多少衆。前三々矣後三々。
臨濟錄開講

赤肉團兮無位人。面門出入古今親。要知快豁祖師意。一喝怒雷驚四隣。

同

正傳佛祖不傳々。唱起吾門濟北禪。欲識他無多子底。喝雷直下逼青天。

護法論開講

一樹菩提箇々圓。何尋枝葉說遺篇。勸君兮不如歸去。五月深林啼杜鵑。
毒語心經開卷

說色說空皆昨非。非空非色尙依稀。甚深般若波羅蜜。旅鴈聲々度翠微。
四部錄開卷

異類中行他是誰。相逢覿面不相知。歸來芳艸池塘路。一曲村歌春暖時。
碧巖集開講

高山流水沒絃琴。曲々無人續正音。一陣西風吹雨過。鴈聲月色古來今。
達磨講式講了兼留別

師自西來我自東。相逢難避半途中。山雲海月未談了。又逐孤鴻入碧空。

佛祖三經講了

擬獅子吼逞狐威。旬日妄談謝昨非。一夜杜鵑半窓月。聲々告別不如歸。
駿州大安寺古範禪衲需道號。乃書模林二字。一偈以祝
遠大。

百丈從傳萬古規。幾人到此老生涯。驀然跳出範圍去。樹下安居也太奇。

浪華瀧野樂女嗜詩文。年三十三。偶感世無常。爲亡父蘆

白居易。就于山僧薙髮。號無着。字眞月。

竹杖芒鞋清淨身。青山到處草廬新。從來吾道無貪着。印水眞如月一輪。

默笑號

毘耶城裏老維摩。不二門頭說甚麼。寒拾依然開口笑。長廊拍手共呵々。

雲窓號

曾與老僧分半間。碧紗映對夕陽山。羲皇牀上眠初寤。閑見無心一片還。

北溟號

七星曾擁紫微宮。萬里波濤辣羯通。待見鯤魚化鵬日。垂天雲翼搏碧空。

賀深奧山方廣寺迎大藏經

深奧山中古梵城。馱來白馬四蹄輕。五千餘卷金文外。鳥語溪聲如是經。

賀彝山東堂辭彌勒寺住光明寺

解虎錫降龍鉢。孟神通遊戲蹈雲趨。祝看三會龍華曉。放大光明度萬徒。

賀雲門寺弘道和尚住山

提起雲門一字關。十年不下避船山。追尋乃祖牧牛跡。勿使閑名出世間。

賀巨麓軒淡海大和尚入西宮海清寺次其大惠武庫開

講韻。

無因緣地種因緣。濟度門開空劫前。祝見巨麓山上境。浪花灘月入新篇。

賀薩水大和尚三住法山

空華小錄
激潑日多東海孫。天龍推轂住花園。直將菩薩清涼水。一洗三千七百門。

詩文

送周禪人歸鄉

攀得峨山行路難。飄然杖錫出長安。蓬萊夜月舊湖雪。照破推敲兩字關。

客中偶成

嶺頭雲霧々。澗下水潺々。忘却來時路。南窓負暖眠。

退尾州瑞應寺

久在欄中不自由。一朝踏斷鼻繩頭。水邊林下歸來晚。何省他人喚放牛。

鎌倉懷古

霸圖跡絕既千載。禾黍離々掛雀羅。只有山間蕭寺在。老僧徐說古人碑。

同白翁和尚赴修禪寺溫泉

杖錫飄然儘自由。綫無一事掛心頭。怪來雪裏熬山客。終夜議論曾不休。

裕堂法叔臨遷化。付千余印證。余時在甲州。偶聞此事。倉

皇下富士川。直趣江府東叡山。納經拜禮。

鐵笻遠入甲陽山。一臥深溪欲閉關。誤被師兄識蹤跡。又隨流水下人間。

駿州清水港三保屋庄太郎。夙感世態。傾心祖門十有餘

年。終入我餐松老師之室。受又梅之號。蓋因三年辛苦嘗

栽竹。一夜工夫又爲梅之語也。一日叩其寓。居士有詩次

韻。

透徹木犀香裡則。試尋高處倚枯筇。話到碧潭秋月境。分明死水不藏龍。

訪天然齋唐山幽居

支公買得沃州扉。青眼眠來倚翠微。一抹寒烟堪西處。牧人遙逐犢牛歸。
游由井桃源寺

門前海水廣長舌。屋後青山清淨身。桃源滿地華藏界。未必人間有此春。
神機獨妙禪師古道場。鵝林山松蔭寺在豆州原驛。往年
禪師接物利生之日。輪下英俊各結庵于東西六七里間。
窮明已事。予每過此地。竊謂。這箇松間蟹舍漁屋。皆是遂
翁。東嶺快岩。大休。三十有餘員之善知識。折脚鐺內烹菜
根底之草蘆也。比之今時安坐大道場飽食暖衣之輩。不
啻霄壤。因有感打一詩。

鵝林下事依誰話。處々門庭魯似魚。歎息百年期未滿。松間蘿閉古人廬。
咏蟬

苦訴無常薄暮頻。風餐露宿一枝身。分明不識春秋事。孤負長生久視人。
小子粲也掛包入幡圓福僧堂。參鷲王老師。聯一詩以示。

莫謂文章不立禪。五千餘卷古今傳。香林曾侍雲門室。親錄紙衣十八年。
賀大福和尚退隱

三十年來住此山。授徒化俗日無閑。從今放下諸緣去。竹所梅邊閉一關。
訪快翁居士

鴻鴈聲寒日欲曛。暮雲深擁故人門。十年尚認來時路。破笠空囊入此村。
送智映阿闍梨歸浪花大乘坊

從來高潔護鷺人。氣宇溫良和似春。五十三關花簇々。羨師金錫入霞新。
題武陵桃源圖

春滿桃源洞裏春。丹山綠水帶霞新。樵夫欲問真仙術。笑答昔時來避秦。
和金華道人歲旦韻

一回吟出一聲濃。妙偈恰如應扣鐘。流水高山和未調。沒絃琴奏屋頭松。
寄彌勒尊者

百千諸佛皆禁酒。獨有斯尊得自由。不待龍華三會曉。神游兜率與閻浮。
寄中泉松雲居士。次咄哉老師韻

多年尋覓主人公。倒嶽傾湫勢似龍。到得歸來無別事。青松夢在白雲中。

奧州祖晉禪人歸省也。有枕山蘆洲松濤諸老送行詩。予

亦倣聲次其韻以贐。

久入詞林學海間。推敲字就可無間。從今弄得九華月。相伴白雲眠故山。

送玉子歸錫尾州德源僧堂

佛法元非輕卒事。三登九至幾多年。一千五百善知識。都在笊籬木杪邊。

武州法華寺徒。丁兵役歸省。其志洵可感也。因次聽松老

師韻。以壯其行。

七尺青龍意氣新。東風千里獨鞭春。歸鞍莫背桃園約。天下處無非馬塵。

中村敬宇先生見訪臨濟寺寓居。有詩次韻。

覺得邯鄲夢一場。芙蓉峰下暫韜光。仁人境界天然別。五大洲中是我鄉。

木村二梅見訪有詩次韻

相逢一笑話方奇。彷彿淵明訪遠時。蓮漏夜深人去後。殘燈獨詠七言詩。

平山省齋見訪有詩次韻

寄跡溪間物外身。平生受用只清貧。山房今日親相見。君是靈山會上人。

訪林祭酒小島莊有詩次韻

路入幽溪日欲斜。孤筇曳去訪君家。西窓深到巴山話。別盡青燈數片花。

游鳥坂鷄冠堂。有菱湖老人詩次韻

幽窓冬暖日如春。老樹清泉太古風。坐自鷄冠堂上望。南山總入畫圖中。

有禁神佛混淆令漫賦

李是白兮桃是紅。維神維佛不曾同。可憐此道千年後。痴子空傷杯裏弓。
上朱印

三百年來封土章。無端今日上朝廷。黃梅雨裏任筇步。滿草寒烟鎖古城。
次林鶯溪韻

岸柳野梅壺裡仙。三間茅屋送殘年。山僧活計只如此。何管桃花別有天。
題清見寺次朝鮮翠一好寬韻

飛泉遙下白雲間。如此炎天毛骨寒。仙境由來曾不遠。十洲三島倚欄看。
同茶溪省齋等數子登嶽

踏雪徐々上碧空。千山萬水一眸中。忽然感得蓮華石。且喜身在兜率宮。
游萬象寺次林祭酒韻

路近仙州天地別。青松白石幾灣餘。不知人海風波惡。一曲漁歌入梵居。
重陽客梅谷久保田氏

心身共與太虛同。稍說桑滄歎轉蓬。自笑頻年零落甚。借人籬落見秋風。

寄半用老人連梅翁

一筇一笠一蓑衣。踏斷乾坤總昨非。我亦他年雲水客。風餐露宿夢依々。

賀矢口謙齋先生辭職

折腰五斗非君意。賦得田園歸去來。好有歲寒三友在。又令惠遠下山隈。

和磯部峻齋春興韻

不問去年霜雪苦。相逢相值喜春晴。真成百事皆如夢。好弄鶯花送此生。

登藏珠寺呈蓉園和尚

峰迴路轉晝陰々。一帶溪流太古琴。向上關門誰入得。故人獨坐白雲深。

次磯部物外老寄柴田君韻

臥薪嘗膽獄中居。怒髮衝天威有餘。萬古英雄名不朽。一竿風月五湖書。

宿豆南中木港高野氏家次其韻

空華小集
東海三山不老春。異花奇樹映波新。堪思徐福携童去。避世長游物外身。

野州行道山十勝

清心亭

紅塵飛不到。高閣白雲中。靜坐清心處。深溪起冷風。

指月橋

杜鵑啼不止。巖洞夜蕭々。騷客三更後。徘徊指月橋。

宿龍池

碧潭深幾丈。知是宿龍池。白日風雷起。正當騰上時。

止母石

親子情何絕。尋來兜率春。溪頭見斯石。長嘆自障身。

不明堂

山深多異花。巖石啼靈鳥。入定待何時。龍華三會曉。

涅槃岩

曠劫無生滅。分明般涅槃。岩頭時枕臂。夢結白雲端。

大悲閣

澗水廣長舌。青山清淨身。圓通無罣礙。開示普門春。

請雨臺

久旱無青草。幾人零此臺。寒光三尺劍。倏忽起雲雷。

山神廟

星霜知幾歲。護法白雲層。真個有神力。曾無片石崩。

雙布瀑

雙龍跳碎玉。片々落雲端。六月人間熱。渾身似鐵寒。

西濃土屋即心居士。欲隆花園講社。特抵東京。其志可賞也。因此贈。

他謂非心我即心。青山不動舊知音。而今擬問花園事。微笑庭梅黃似金。

育兒院迎春次曉宗師見寄韻

福田墾得已三年。種月耕雲慕古賢。後百丈兼前百丈。灰頭土面是何禪。

仙臺保春院阻雪

一簑一笠到仙臺。積雪皚皚自作堆。寫出嵩山真境界。少林從是挽春回。

上中尊寺

三世英雄跨輿東。古城無跡鳥聲空。孤峰只有中尊寺。金壁光寒老樹風。

育兒院

育兒八十有餘人。無乳無家無二親。我亦江湖萍水客。孤貧形影轉相憐。

富岡氏見示黃檗鐵牛禪師自畫讚阿彌陀如來之幅。乃

賦此書其裝裏。

水鳥樹林真實相。唯心淨土即娑婆。鐵牛機外參尋去。直是無量壽佛陀。

見長者山打毬

肥馬輕裘白與紅。打毬爭奪疾如風。天皇曾自龍顏動。鉦鼓聲高八戶中。

客舍聞鷓

到處青山是我扉。胡牀浴罷夢依依。杜鵑不識禪僧意。月下天涯切促歸。

登常在院

何日移來靈鷲山。乃知天地異塵寰。世尊說法茲常在。不斷潮音拍北灣。

過小野小町舊蹟

傳聞此地出聲媛。一片殘碑印雨痕。借問遺蹤何處是。嬋娟芍藥放花繁。

見鳥海山

雪氣聳空鳥海山。羽前國裏最高山。藤公昔日朝鮮役。誤認此山爲富山。

過柳津圓藏寺

萬岳千山清淨身。靈巖百尺是天眞。檻前遙見魚淵水。弘誓船浮楊柳津。

同聽松師三尾觀楓

高雄山

四十年前遊此山。風光今古異人間。紅楓織錦雲端樹。立盡斜陽不識還。

槇尾山

清流一帶隔塵寰。古梵宮從楓葉間。默坐老僧呼不答。香烟薰徹白雲關。

梶尾山

諸堂灰盡只青巒。招客旗同楓葉丹。欲憇高僧禪定地。酒舖茶肆不堪看。

冬日田家 風觀會隱題

一園芋栗一籬花。東舍西隣互喚茶。人海風波曾不到。耕雲種月淡生涯。

寄直入畫伯

自在雲游西又東。南宗之趣與禪同。清談元是紅塵外。直入千山萬水中。

喜靜岡縣知事關口君來臨於鐵舟寺賦呈

象駕來尋東海濱。曾無一物獻高賓。窓前只有芙蓉在。萬古千秋帶雪新。

初見郡長堀尾某君

天正之世一英雄。義氣傳來到老公。今日初逢如舊識。梅花含笑對春風。

君爲堀尾首晴裔故及

邂逅水谷忠厚於鐵舟居士廬

目擊道存談話新。蓬萊今日有斯人。豁然一自知天爵。直節虛心好抱眞。

君自稱天爵大神故及

萬象愚庵長老號提無室。予法弟也。久參梅林羅山老師。

幼而與予同鄉。長而同師。壯而同國。蓋宿緣也。明治癸未

年再遊而侍伽山老師于東京選佛場。爲人嗜書畫。禪餘

與文人墨客交。編所得詩畫爲一帖。乙酉歲予老而入補

陀落山。與萬象為比隣。長老一日携帖來。而乞詩。乃題曰。

斗室甘愚趙老禪。拈提無字不期年。誰知萬象森羅趣。突兀富山三保前。

送天野義格卒業同人社遊學米國

同人社裡久精研。負笈今遊米利堅。哲學真源通徹後。弘通正法異鄉天。

詣立石寺

怪石奇巖幾重關。是非鬼削則神刪。雲深千有餘年寺。知道高僧入定山。

台宗慈覺大師入定此地。故及。

御物川舟中

葉舟解纜角間川。野飯村羹一鼎煎。忘却旅中春雨苦。蓬窓載夢入秋田。

津輕途上所見二首

半年雪裏老生涯。馬屋人居共一家。風土元憐寒帶地。不論晴雨着烟蓑。
土人說話不分明。推問再三微識情。却怪鷄鳴兼狗吠。一聲宛似洛陽聲。

谷地溫泉專適婦女子之病。地勢負山。地僻人樸。距奧瀨

西五里強。位谷地嶽東南焉。余巡化此地也。淨圓長老延

入旅館。散客中之鬱。於是乎。余開教筵。為浴客講佛祖三

經。前後五日間。其地幽邃。不讓寒山窟。懶山居。因得七絕

四首。

行

三間茅屋空山裏。日浴溫泉俗事稀。領得願神養生術。又携籃子采芳薇。

住

三間茅屋空山裏。石鼎煎茶梅雨天。西舍東隣歸佛法。時々對客說因緣。

坐

三間茅屋空山裏。獨坐寥々聞子規。世俗紅塵飛不到。紙窓半夜月昇時。

臥

三間茅屋空山裏。放得桃林一老牛。兩脚伸來臥溪畔。更無塵事到心頭。

游嵐山浮小舟上大悲閣

下圓通又上圓通。兩岸霜楓掩映紅。欲見嵐山真面目。一身早入畫圖中。

浴嵐山赤巖堂鑛泉

心身洗盡似秋清。誰向仙家養此生。一夜溪音眠不得。欵頭猶聽誦經聲。

留別花園教校諸禪友

汲一河流亦宿緣。花園況是共交肩。慇懃爲報滿堂衆。學海飲乾參此禪。

宿塔澤玉湯

飛閣高樓映水新。溫泉如玉淨無塵。溪聲忽攪旅窓夢。欵枕猶疑山雨頻。

宿笹川某別亭賞池蓮

來宿濂溪茂叔家。香風吹滿別生涯。因思東武篠池上。冒暑幾回看此華。

答新瀉縣令尹篠崎君三首

無宗教即有宗人。綠水青山滿目真。看破七情兼五欲。是心是佛是心神。

君常曰。我爲無宗教。故及

因果歷然曾不欺。宛如五穀實秋時。先賢有語施陰德。即是子孫長久基。

君問以因果有無。故及

佛法元來無古今。強將像末自沈吟。三千年後不移變。雪解越山信水深。

君問。佛法有正像末乎。故及

題指雲亭

指月看雲老樹陰。煎茶石鼎味尤深。風流千歲無他事。都在當人一片心。

播州書寫山

瞻仰空師開闢山。大悲靈跡即仙寰。香烟散盡僧何在。唯見暮鴉頻往還。

石寶殿

石殿苔蒸千萬載。仰看鬼削與神刪。鬼神今日那邊在。拍手聲々自答山。

尾上鐘

千歲高聞尾上鐘。尊崇皇后獻神龍。一聲非破輪迴夢。齋地三韓來倒鋒。
敦盛

可憐年少秀眉公。自重武名輕此躬。今日塔前呼不答。荻花深處起秋風。
大教校內蝸牛庵工竣

三間茅屋古風存。不許俗人參我門。莫笑維摩方丈窄。蝸牛吞却盡乾坤。
靜岡蓬萊亭上次中島錫胤韻。似和田年貢。

四海兄弟誰是賓。交情深處即天真。蓬萊方丈瀛洲裏。依舊梅花春色新。
應和田老人需老人爲觀舟居士門人。而能擊劍。

白髮紅顏一老翁。倚天長劍斬春風。問尋三略六韜旨。笑指庭前黃石公。
切斷大灘歷一尺強。橫七寸強。時明治廿一年六月二十八日也。

一刀兩斷合成身。絕後蘇來如是真。從今永劫無量壽。雨過青山青轉新。

切解大灘後經三月得橫眠喜賦

三月之間被病纏。帳中憑机不橫眠。夜來穩結蘇生夢。一覺殊欣得仰天。

高橋泥舟居士戒予曰。病後必勿勞精神。

病根洗盡潔如秋。心與虛舟伴白鷗。放下諸緣憑几坐。又何憂矣又何憂。

訪中島信行君子久保山山居

老松深處築新居。釣水獵山興有餘。塵世榮枯曾不管。閑窓日見古今書。

送米國遠爾格土君歸國。呈本朝高僧傳一部及予眞影

大道元來妙不傳。祖師美躅在斯編。今朝臨別聊相贈。請見扶桑國裏禪。

訪志摩波切仙遊寺密應和尚。有詩次韻。

大殿新成對古城。波濤聲和誦經聲。白鷗眠穩仙遊境。萬里芙蓉隔海清。

再次密應和尚見寄詩韻

幾回入夢古香城。聽罷虫聲又鴈聲。欲見師兄微笑面。山楓籬菊露華清。

大光院賞月

風清露白冷侵膚。此夕痴雲半點無。貪見大光三五月。當頭失却掌中珠。
臨南宗畫學校開筵式。賦似校長田能村直入君

三十六峰紅葉天。名工此日設新筵。從來我亦南宗客。來祝風流頓悟禪。
題富士廼曙集

盡扶桑國別無峰。瑞靄祥雲此地鍾。三島十洲天未曙。紅暎先照玉芙蓉。
示播州關弘道禪人

飲乾學海破雲關。此道從來行步難。吾子祇應弘此道。播摩灘上捲波瀾。
上花園婦人會長元最勝心院宮文秀女王殿下

最勝心宗直指禪。拈華微笑不傳々。靈山之會文斯在。度盡人間又度天。
喜平井龍華自米國歸

不待龍華三會時。論宗說道奏機奇。鯢波萬里歸朝日。七十老僧開笑眉。

野州鹽原妙雲寺十勝

梅檀瑞像

梅檀瑞像自西天。化度支那日本傳。免得丹霞辛辣手。遠來毛野結因緣。

古殿涼風

老杉高聳晝陰森。拂々南薰涼氣侵。趺坐焚香憑杌睡。不知西嶺夕陽沈。

甘露飛瀑

四顧青山青轉鮮。曾無半點惹塵緣。窓前飛瀑炎天雪。凍殺心身不暫眠。

巖間溫泉

湧出巖間甘露湯。自然冷熱得其量。浴餘溪上曲肱睡。一夢遊無何有鄉。

妙雲古碑

曾從源氏敗平軍。兄弟妻兒各已分。七百年前槐國夢。雲間高聳九輪墳。

鯢鐘破夢

豐嶺自鳴霜夜鐘。懸空甘露最高峰。平常不啻報時刻。驚破人間迷夢濃。

高雄楓裝

誰謂山間教育微。高雄淑德古今稀。令人蚤示無常旨。繡出霜楓作上衣。

蓬萊仙橋

東海三山何處邊。蓬萊橋上似通天。負薪雪頂厖眉老。不是秦時避世仙。

三伏鶯語

三伏炎蒸似火坑。今年忘夏養殘生。黃鶯亦愛溪山好。常到窓前得意鳴。

東山吐月

白露金風灑氣清。客衣惹得故鄉情。夜深月出東山上。草底堪聞蟋蟀聲。

送圓山玄魯。坂上宗詮。原圓應。日吉全識四師。從軍布教。

從軍萬里報天恩。鷺駕鐵船浮海門。預祝功成名遂日。凱歌高曲奏花園。

宿播州清島村清溪館

綠水青山太古春。當軒躑躅雨餘新。清溪洗耳無塵到。正識先賢來避秦。

示雪窓梅月禪尼

脫却人間愛欲塵。深宮靜處寄斯身。寒梅枝上娟々月。拂盡浮雲萬古新。

鹽溪閑居二首

無心到處是吾山。况又嶺雲溪月閑。浴後悠然睡窓下。夢清常樂瀑潺々。

脫出人間火宅居。石牀閑讀古仙書。休嗤洞裏無滋味。薇蕨松篁食有餘。

次奧蘭田見寄韻

山々涵碧冷麻衣。丹竈無塵倚翠微。坐愛鹽溪圖畫裏。腕車曳馬往還歸。

訪品川子爵念佛堂

丹山綠水入仙鄉。浴後快談秋日長。不羨西方清淨土。此堂即是寂光場。

送中田雪莊歸京。次其留別韻

紅塵不到別乾坤。豈料高人屢叩門。三笑橋頭談未盡。吟筇棄我出桃源。

謝中田雪莊見惠玻璃硝數十枚

透明無碍玉玲瓏。宜雪宜花又可風。一醉陶々甕机睡。宛然身在水晶宮。

祝鹽原蓬萊橋落成

三島十州指顧中。長橋架得魯般工。蓬萊豈啻通仙客。渡驢渡馬西又東。

謝小川某見贈松竹梅盆栽

獅巖虎石太奇哉。新竹老松盆裏栽。尤愛西湖梅一樹。橫斜疎影放春開。

月瀨觀梅二首

溪南溪北白漫漫。吹面香風春不寒。堪憶西湖林處士。黃昏微月獨盤桓。

十里梅溪路轉幽。香風撲面入山樓。尤奇月瀨黃昏月。寫得橫斜疎影浮。

和齋藤望筑讀書閣詩韻

不羨都門駟馬車。板橋村裏卜仙居。筑波峻嶺絹川水。盡是窓中萬卷書。

臨尾州東春日井郡加爾羅村福田會開筵賦之

勝地新開八福田。種慈耕善好因緣。普憐鰥寡兼孤獨。君子國風傳萬年。

眞月禪尼聞予病。遠自浪華訪鹽溪之寓。常侍枕邊慇懃

看護。今病大愈。禪尼將辭去。乃裁一詩謝勞。

自遠方來慰我身。慇懃侍側殆三旬。老僧今已七十四。別後何年俱賞春。

陪林祭酒。同中村敬字先生訪望月毅軒清居。

絕無車馬響。蕭洒此君廬。窓積千峰翠。筐藏萬卷書。風光幸能美。詩料亦

何虛。月上前林外。清光西不如。

何處生秋草

席上探題

何處生秋草。秋生山嶽中。泉聲消暑氣。溪竹引西風。坐石塵緣遠。據牀心地融。何來蟲語至。新月照幽叢。

同中村敬字望月毅軒二君游建穗寺。次越山韻。

振錫涉安水。偶逢邱壑娛。老楓遮道錯。幽鳥隔簾呼。爲此曾襟快。何嫌歸

路迂頭々阿字界。空也本來無。

秋江晚渡圖 席上

沙頭天欲晚。蘆荻帶烟昏。風靜忘歸路。秋高迷旅魂。群鴉喧岸樹。孤鴈落前村。江上堪描處。清波月一痕。

矢口謙齋先生新築邸宅招飲。同茶溪敬字二先生分韻。

得山字。

欲訪幽人宅。乘晴出竹關。衆林催綠葉。孤艇繫清灣。魚戲芰荷裡。蝶飛泉石間。高談無俗事。相笑對青山。

青山無影居士。見示道痴居士近什。司馬溫公題傳燈錄

詩次韻之作。因傲擊。

誤認法門終是狂。他鄉多是做家鄉。窓前新燕啣泥舞。簾外老蕉因雨傷。胸裏有求形則鬼。心頭無事氣如王。勸君放下諸緣去。豎起脊梁須向墻。

謝白翁師來訪

憶昔江陵飛錫年。花前月下與交肩。青雲易老池塘夢。白髮先留鏡裏天。病退偏知茶有味。力微尤愧話無禪。簷頭只聽黃梅雨。點々彈來叔夜絃。

次岡凌霜先生歲旦韻

君是詞林柳柳州。如斯文質向誰羞。躍淵霜劍元難測。收櫃明珠曾不售。負笈當年登甲第。下帷今日拔群侔。典謨宜進昇平事。聖主待賢恩遇稠。

春禽 分韻

隱士橫肱夢樂邦。熙々紅日透紗窓。白梅香裏頻求友。翠柳枝頭好作雙。鼓吹詩腸茶七椀。砭鍼俗耳酒千缸。山間日永春如畫。何與閑鷗伴綠江。

乞丐兒

久拋塵事儘雲遊。南北東西任去留。乞食時扶桑節杖。防寒常着木綿裘。簞瓢快樂誰能解。軒冕富榮吾豈求。莫訝本來無一物。百年人世托浮漚。

題窪田翠濤翁畫山水

十里江山攢筆端。疎林瘦石自生寒。老楓隔谷紅將燁。菊圃籬落露不乾。
橋上擁琴人佇立。沙邊傍母鶴盤桓。天工何及丹青妙。縮此乾坤咫尺看。
觴月歌席上

詠蓬萊山賀溝口令息合香

有山有山蓬萊山。積水萬里繞波閑。巔有蒼松如龍蟠。勢欲飛騰雲漢攀。
傍有梅花香馥郁。冰姿玉骨笑開顏。猗々淇園君子竹。龍孫鳳子幾灣々。
數隊靈龜護地軸。一雙丹鶴舞天寰。君不見蓬萊山上仙遊處。都在人間
一和問。

次梅林含輝老大師歲晚示衆韻。寄法弟智囊

嗟爾誓欲脫全鎖。匹馬關山向西嘶。元是兄弟一槽食。老驥伏櫪恐風吹。
今爾游泳禹門浪。傾湫倒嶽莫失時。從前知解輪迴苦。一向可修南泉痴。
垢面蓬頭雪山苦。一麻一麥六年飢。須彌可輕一粒米。寸針寸草皆信施。
河東苦寒尤盛大。雪夜霜晨股引錐。古今爲法拋身命。一回蘇來不狐疑。
枯木巖前多差路。草窠裏莫守死屍。何關陌上貴公子。白馬金鞍縮柳絲。

歲旦

萬象之中獨露身。何愁白雪滿頭新。東君有賜無量壽。柳綠花明却外春。

同 係明治廿五年之作

春滿長安幾萬家。雪消三十六峰霞。法山別有新條在。一卓開敷柱杖花。

同 明治卅一年寓尾州瑞應寺

到處青山是我山。寒梅傲雪舊時顏。堪嗤七十三愚禿。猶在行雲流水間。

除夜

爐中埋去舊年火。瓶裏汲來新歲泉。鐘未鳴兮鼓未響。破蒲團上打安眠。

同 明治卅年師在尾州瑞應寺所承囑賈淨三禪人者

從來各自水雲身。南北東西來待春。恰是寒鴉風雪夜。相喚相呼到天晨。

偈頌序

吾宗中古以來。稱偈頌。大都以七言四句。故幼時學詩者。以諧韻字平仄為先也。至其妙。固言外有餘音也。昔徑山虛堂禪師送人詩曰。相送當門有修竹。為君葉々起清風。無學元禪師佛光國師見曰。句中無禪味。堂大笑。自然元得言句妙。雕琢却損性靈真矣。我餐松師翁謂野州瑳首座。幽徑絕無樵者語。陰崖重有獵人過。此二句可謂妙。首座曰。何足為妙。翁曰。何句為妙歟。首座曰。石壓箏斜出。崖懸花倒生。翁驚然。尋常語予曰。凡作詩偈者。可着眼也。魯禪人乞題字。書為序。

遠州中泉咄哉庵過去帳序

殄松老師。多年接物應化之間。久參老宿。參學居士。碁布東西者。不可勝數也。就中。見附中泉之地最多。然而電光忽驚。石火倏滅。往々歸鬼籍焉。連福寺前住舜山大和尚作過去帳。欲供養道友亡後。其志堪嗟歎。因書

以爲序。云爾。

示小子宗誰後改清隱

雖有南金。非入大爐。鑄經百鍊。千鍛。則不成純粹之精金也。荆山之玉。不落卞和氏手。則碌々一塊石而已。豈望連城之無價哉。物逢其主爲難矣。故比針水於千歲之曇花。譬遭遇於三千之蟠桃也。世尊見四病者。感無常。入雪山。麻衣草坐。艱辛刻苦。鵲巢肩。蘆穿膝。六年。達摩大師踰萬里波濤。見梁武帝。機緣不契。入嵩山石室。面壁九年。終得一箇斷臂漢。臨濟大師入毘尼藏多年。後喫黃檗痛棒。雲門大師參睦州和尚。挫折一脚。夾山禪師參船子和尚。拋向逆浪中。慈明和尚河東苦寒。引錐自刺。徹夜不眠。楊岐禪師出入金穀三十年。香林禪師侍雲門大師十八年。得紙衣名。西天四七。東土二三。五家七宗祖師。皆精練刻苦修此道也。我朝祖師。越大海入震旦。言語不通。於筆上參得此事。豈浮心躁氣者所企及哉。諸天爲

此感護。到處無恙。如大燈國師五條橋下乞食行。如吾山關山國師揖深山中長修牧牛禪。每舉此事。寒毛卓豎。使千載之下聞者感憤興起。不能自已。古人爲道忘身如此也。要且有入作家大爐。鑄兼落玉人雕琢手。方爲一箇真正道人矣。誰也。備入先師之室。落髮受戒。不幸而早訣先師。侍予十餘年。予也。非作家。非玉人。而空使備碌々在石中。予也。向先師定中。滿面愧汗。無言可述矣。今秋逢自恣之日。告善財南詢之志。嗚呼時逢騷亂。諸善知識堅閉門戶不入。祖庭秋晚。可不嘆哉。菴巖老大師有所感此。發大誓願。穩坐德源大道場。遍接四方衲子。實是夜途之巨燈。迷津之寶筏也。備今入老大師爐。鑄精練刻苦二三十年。縱令鈍鐵。豈不化真金者哉。且如日用真修事。全提玉子文備矣。備到彼。宜謄寫以爲規則。荆山一塊石。今幸落卞和氏之手矣。勉之哉。

大安寺方丈記

泉州堺港。大安寺方丈者。繹其原由。元龜天正之際。同港豪族有魚屋助右衛門者。天性勇敢。而有志業。通商貿易。數往來東印度。及南洋諸島之間。當時海內鼎沸。殆無寧日。助右衛門乃講臨機應變之策。率壯丁百餘名。越海直襲呂宋島。島王以兵少而不能拒。納貨乞和。乃收之而歸港。於是其富倍蓰昔日。因自改姓。曰呂宋矣。信貴城主松永彈正久秀。以食邑三千石招之。辭而不應。後爲豐臣氏所滅。今此方丈者。即呂宋氏之故宅也。傳云。一日松永久秀訪呂宋氏。巡覽其家屋庭園。嘆曰。結構壯麗。至矣。盡矣。俄而拔刀斫柱。曰。俚諺不言乎。滿者必缺矣。今我爲吾子。祝後災之除禳耳。椽柱今尙存刀痕者。即是也。其西室屏障。所畫西湖圖。實古法眼元信之筆。而其餘皆狩野永德所繪也。至其落筆端正。而變化無窮。氣品溫雅。而秀拔適健。則真爲海內逸品也。余嘗聞永德畫屏障之間。偶有駿府公急命。乃遽整旅裝。而上途。然猶行思屏障之畫。經營不休。至尾陽

鳴海驛。俄然覺先所繪松樹。少一枝。忽却回來添之。世人傳稱云。枝添松。良工苦心可尊也。爾來三百年于茲。而幸免祝融氏之災者。抑亦可謂松永氏之賜矣。

殄松老大師略傳

師諱孜純。號雪航。曰餐松軒。又稱咄哉軒。豐州小倉藩士。大橋某之子。幼而穎異。登其州黃檗宗廣壽山。落髮受具。親檗宗有僻習。更衣入濟門。爾來撥草瞻風。參妙峰於備中。妙喜於遠州。象瓠於下總。其他參海內宗匠廿餘員。到處皆證之。而師自不肯。後拜月珊老漢於前備州之國清。精練刻苦數年。遂盡吾門蘊奧。受印記。然而韜光晦跡。長養聖胎。後住京師峨山正圓庵。居三年。避山內執掌。退廣澤要行院。修牧牛道。江湖雲衲。慕跡輻湊。師厭之。南去入紀之山中。結茅茨靜居。又東去。再叩妙喜於駿之鳥坂。會妙喜戡化。迦陵董席。方陵移幢于相之永田。令師董鳥坂道場。居三

年。應庵原圓應寺之請。又寓居尾之瑞應二夏。又應濃之虎溪僧堂之請。演法之間。拮据經營。再建禪堂。修繕門廡。規矩大備矣。天下龍象輻湊於此。常滿五百指。居五年。師有養老於暖處之意。駿之道俗。聞之歡喜。建一菴於江尻清水之間。請師。其境也。萬仞富峰當窓。三保青松橫檻。而伊豆諸山恰如垣牆。清水港灣宛似盆池。師素愛山水。故大愜幽懷矣。師自扁曰殮松軒。蓋依古德渴飲半掬水。飢殮一口松。胸中無一事。高臥白雲峰。偈意也。遠之緇素慕師德者。亦新築咄哉軒於州之中泉驛。請師。駿遠爭請。於是師春秋往還兩所之間。接衆化民。二州之風俗一新面目矣。暨師老衰。臨濟大乘。長福諸刹。輪次迎駕養病。師一日集衆於長福云。我將以明日逝。翌詰旦。剃髮沐浴。着淨衣。披袈裟。結跏趺坐。示末後因緣。朗唱偈曰。咄咄咄。六十六。擺手行。怒眼睛。喝。唱了坐脫。實明治四年辛未七月七日也。茶毘得舍利。分骨建塔四所。曰京師峨山正圓庵。曰駿之山原長福

寺。曰同州鳥坂妙立寺。曰遠之中泉泉藏寺是也。嗣法者。雲之郁梅嶺。駿之雪白翁。同州恒貞山等也。其餘隱晦。不顯世者。亦甚多矣。

聖德皇太子報恩碑銘

聖德皇太子用明帝第一子也。穴穗部皇后夢救世菩薩。生太子。生而有聖智。推古帝立爲太子。贊輔太政。太子精工事。創建四天王寺法隆寺等十一寺。又作十七憲法。政令明備。天下歸德。其薨也。哭泣之聲滿行路。今茲鹽原工匠。鋸夫相議。建報恩碑。乞予銘。銘曰。

十七憲法。一新吾民。崇神儒佛。至誠如神。伽藍堂塔。

革古鼎新。鹽溪匠鋸。刻石表眞。昭矣懿德。茲輝萬春。

渡邊善邦翁碑銘

翁諱善邦。通稱友右衛門。後改平兵衛。本姓香取氏。寬政三_{辛亥}年生于高原驛。壯而出嗣湯本鹽原渡邊氏。翁資性篤實。尤富果斷。每事起。鄉人就

而諮其可否。翁諄々指導。如示諸掌。勒組頭役。二十餘年。傍設家塾。教養子弟。遠近來遊者數十人。德化大行焉。翁以安政二乙卯年八月廿五日卒。壽六十又五。門人某等胥議。建碑。乞予銘。銘曰

山高水潔。產此偉人。虛心坦懷。果斷如神。移風易俗。

溫故知新。留名片石。傳德千春。

木魚銘應又梅居士需

有竹在渚。伐爲木魚。外存直節。內含大虛。

不問不答。如魯如愚。誰能受用。又梅老夫。

竹筇銘

扶過斷橋水。伴歸無月村。誰知三尺四方竹。中有龍吟聞不聞。

祝龜谷山結成寺再建文

大日本。靜岡縣。駿河國。安倍郡。內牧村。龜谷山結成寺者。建久年間。工藤

佐衛門尉祐經之所創建也。祐經法諱稱龜谷院殿天德法輪大禪定門。古碑尙存於境內。其後罹兵火。伽藍悉歸烏有。久爲荒蕪之地。天文間。南寂豐公於其舊蹟。建立堂宇。號龜谷山結成寺。拜請本寺臨濟二世寶珠護國禪師太原大和尚。爲開山始祖。自居第二世。屬京兆妙心寺也。三世智岳觀公。頗有道譽。東照公深歸依之。屢請駿府問法要。觀公遷化之後。東照公建碑。其文有云。奉智岳觀公禪師。征夷大將軍前右大臣從一位源朝臣家康建之云云。其歸敬可知也。三代將軍德川家光公。寄附朱印五石及山林若干。充香華之料。蓋結成寺爲臨濟末寺中之首班也。惜哉。其後住持不得法器。諸堂頽破。什具散逸。只僅存外形而已。現住巖宗長老者。濃之靈松院之徒也。曾侍妙喜老漢于武之永田。駿之鳥坂。爲飽參之士。本寺臨濟興道大和尚。觀長老行業綿密。拔之於衆中。令住結成。一住三十五年。舉絕興廢。不違更悉。今記其二。三。嘉永七年。修覆庫裡。惣門

舊葺以茅茨。安政四年改之以瓦。慶應元年新築書院。明治五年請山野啓建授菩薩戒會。同十一年購水田六反八畝拾九步爲寺產。同十二年再修庫裡。改茅爲瓦。又買水田七反六畝拾九步加寺產。同十三年新築菑庵。同十四年新築中門。同十六年新築客殿及玄關。又求境內之上地官林若干。加寺產。其他如備法器佛具。莊嚴法儀。則無日無之也。眞可稱中興之祖也。長老齡六十有七。鑠鑠不異壯者。日日黽勉檀興。嘗無倦怠之色。可謂大心菩薩能莊嚴佛國土者也。山野記其梗概。爲大佛殿上棟之祝辭。且繫之以偈。偈曰。

諸堂對立勢崢嶸。建化門中托一生。革古鼎新時節底。滿山燕雀頌聲清。

祝法雲山興禪寺庫院再建文

靜岡縣駿河國靜岡市寺町。法雲山興禪寺。現住隣玉東堂。自移錫於當寺以來。潛行密用。興廢繼絕。檀信歸崇。只庫院大破。不堪法務。東堂久憂

之。檀越之中。有貴族院議員宮崎總吾者。曾歷任有渡安倍兩郡長。頗有令聞。其族安吉郎。同政吉等。俱皆勇作善之士也。慕布金長者之勝緣。而發希有無上之大願。協心戮力。喜捨淨財。終建築庫院。蓋深感東堂之德行也。夫庫院一稱香積界。昔佛在世時。維摩居士請佛世尊及諸大菩薩諸大阿羅漢。於毘耶離城。供香積界之黃飯。即今香積界落成焉。即與佛在世香積界。二而不二矣。論三千年今昔。若不爲如是之觀。則造塔供佛。亦有何功德乎。宮崎總吾曾入山野之室。粗解這般消息。是以山野綴一偈。祝遠大也。偈曰。

香積新成忽改觀。齋僧供佛榻尤寬。有功德矣無功德。月在法雲長夜圓。

金鳳山平林寺再建上棟文

埼玉縣武藏國新座郡野火止村。金鳳山平林禪寺。舊在同州岩槻城西三里許。石室玖和尚所開創也。物移星換。寺門大頽廢。東照神君領關八

州之日。改造諸堂。屈請駿州臨濟寺鐵山大和尚。爲中興開祖也。和尚住山僅四年。傳法燈於雪堂。歸住臨濟。第五世幽岩和尚。謀檀越松平伊豆守信綱。寬文三年癸卯。卜野火止村。移置伽藍。修補堂塔。於是所謂七堂伽藍者。悉備。鬱爲關東大道場。慶應二年丁卯十二月十日。劫火洞然。殿堂悉燼滅。所殘者。僅佛殿。山門。總門。塔頭而已。誰敢不嘆息哉。先住圭巖和尚。發至誠心。欲復舊觀。不成而戢化。嗣法藍溪長老。繼先師之志。孜孜勉々。輸石搬土。拮据十餘年。遂造營方丈書院。及庫裡。斧斤之功完備矣。其間不惜身命。備嘗辛酸。可謂檀興法儀。能莊嚴佛土也。今茲明治十三年十月十五日。修入佛供養大法會。請列山諸刹耆宿。諷誦白傘蓋神呪。令駿南苾芻貞山。拈一瓣香。虔供大恩教主釋迦牟尼世尊。開山大和尚。歷代祖師。檀越各靈位之次。轉讀大般若經六百軸。專祈山門鎮靜。火災不起。又設水陸無遮會。普同供養三界萬靈。願憑此功薰力。皇風永扇。帝

道遐昌。佛日增輝。法輪常轉。國家清平。風調雨順。至祝至禱。偈曰。殿閣新成。蓋大功。龍天護法古禪叢。須彌安坐燈王佛。放白毫光照碧空。

大龍山臨濟寺庫裡修覆棟札文

大日本。駿河國。安倍郡。大岩村。大龍山臨濟禪寺者。享祿年中。國主今川氏親公之創創也。始稱善德院。天文五年。今川氏輝公卒。埋之于善德院境域。今川義元公。爲修兄公氏輝之菩提。再建諸堂。改稱大龍山臨濟寺。蓋以氏輝公之法號。冠寺門也。義元公請寶珠護國禪師太原大和尚。爲住持。其後當臨濟寺殿拾三回之忌辰。更屈請圓滿本光國師大休大和尚。爲開山始祖。太原和尚自居第二世。可謂謙而至孝也。義元公寄附寺領三千石。永充香華之資。永祿十一年。甲州兵亂入域內。放火攻戰。寺門罹兵燹。歸烏有矣。元龜三年。武田信玄。蒙勅再建。工央而卒。嗣子勝賴繼業完之。且寄附寺領千石也。方天正十年春之役。堂塔再罹兵火。歸灰

燼。正親町天皇親下 宸翰。命國守德川家康再建焉。其存在于今者。僅丈室一字而已。家康公欲寄附寺領千石。住持鐵山和尚固辭而不受。代之乞行厨之器。乃以錢百貫文充之。後改爲寺領百石。永世不更。享保十二年春。第十三世鏡水和尚謁德川將軍之日。殊賜金百兩。令和尙修補諸堂。和尚乃再建庫裏。修覆其他。按之諸記錄。頗觀苦辛之蹟。如和尚則可稱中興之祖歟。爾來閱星霜一百五十年于茲。維新之際。官沒收寺領爲遞減祿。以故厨庫不給。加之。上漏下濕。無奈何也。及明治十一年。庫裏荒廢。殆達其顛。今而不修補之。則或歸倒壞。於是乎。發願起工。替梁改椽。轉茅爲瓦。新築章馱尊天之壇。繕學徒之寮房。計其費。殆垂千金。皆是節衣鉢之資也。從初秋。至中冬。其工漸告成。時_{山野}奉本嶠之命。巡錫關之東西。及東北諸州。不遑顧自坊七八年。以故。侍者清隱。代_{山野}董工。可謂能勉矣。茲卜良辰。安置章馱尊天。諷誦白傘蓋神呪。轉讀大般若經六百軸。

所集殊勳專祈。皇風永扇。佛日增輝。山門鎮靜。衆徒進道。四海清平。五穀豐登。

偈曰。上漏下濕幾年々。碧瓦修成功業全。護法善神諸眷屬。以斯功德得安全。

行實

三住妙心前管長貞山恒大和尚

師諱宗恒。號貞山。空華庵水月其別號也。蓋依坐水月道場。修空華萬行之古語矣。俗姓松田。父曰得芝。俳人。母坪井氏。父母常念觀音大士。感靈夢懷妊。以文政九丙戌年佛降誕日。生於尾張國東春日井郡春日井村西屋敷。師幼而穎悟。每戲遊。常集沙石爲塔。十歲喪父。乃登州之如意山瑞應寺。就春齡和尚。落髮受具。十五歲喪母。哭泣過禮。師常嘆曰。受父母鞠育之日長。而報恩之日短。豈得以尋常行業。報萬一哉。從是在芸窓下苦學。而入藩儒奧田鳳文之門。涉獵外典四年。二十歲掛錫于洛西天龍寺。參雪航老師。傍學環中西堂。雪航鐵腕鬼眼。絕無人情。每入室。熱罵冷嘲。見打出數十回。師愈奮勇。提狗子無佛性之話。廢寢食參究。一日豁然大悟。入室呈所解。雪航深肯之。爾來侍航之巾瓶。十有餘年。偶依駿之臨濟

寺請。往而住。師時年三十二歲也。當時殿堂頽廢。屋漏梁傾。雨露浸壇。師得幕府之允許。勸化諸國。以所得淨財。修補諸堂。稍得復舊。觀云。師在斯間。不惜身命。夜坐徹晨。研參微細因緣。竭其源底焉。慶應二丙寅年八月師年四十一歲。設罷參齋。開堂演法。接得道俗。授菩薩大乘一心戒矣。明治五壬申年四月朝廷置教部省。設神佛合併大教院於東京。補教導職焉。師應徵上京。則補教職。同月任靜岡縣教導職取締。兼東京大教院議事。師慨佛教凌夷。多所企畫。同七年任靜岡中教院事務課長。兼東京大教院講究掛。此年大本山妙心寺。賞多年鞅掌教務之功。賜紫衣及緋紋白七條袈裟。同九年補權少教正。同十年一月參內。拜謁 天皇皇后兩陛下。同年十月爲臨濟宗九派管長代理。巡化埼玉縣及諸縣。同十一年補少教正。同十二年謀淨土宗福田行誠。天台宗唯我韶舜。眞言宗釋雲照。高志大了。大崎行智。曹洞宗青蔭雪鴻。日蓮宗新居日薩諸師。暨濫澤榮一。

大倉喜八郎。益田孝。福地源一郎。三野村利助。澁澤喜作等朝野縉紳豪族。於東京。發起福田會育兒院。教育無告犢獨。兩陛下深嘉此舉。

聖上陛下賜金五百圓。皇后陛下每年賜金參百圓。其他勇善道俗。寄附淨財者。幾萬人。師在福田會。爲常置幹事。拮据會務七個年。其業完備矣。同十三年補權中教正。爲管長代理。同十六年議鐵舟居士山岡鐵太郎。就駿之久能寺廢趾。建立一寺。號補陀落山鐵舟禪寺。師乃讓臨濟寺于清隱。自住鐵舟禪寺。爲開山始祖也。同十七年二月依末派三千七百餘個寺推薦。爲妙心寺派管長。補中教正。巡化奧羽諸國。所暨化益民俗改風。同十九年再巡化奧羽諸國。同二十三年再建本山塔頭大龍院。同二十四年設花園婦人會。爲會員者三千餘人。皆是朝野賢母良妻也。發兌雜誌。花乃園生。磨勵女子知識。獎尙淑德。同二十四年探正法山誌。知開山本有圓成國師洗脚石。在於嵯峨南芳院中。移之于大龍院。建碑傳

後昆。同二十九年二月。辭本山。於野州鹽原。再興妙雲寺。同三十一年聞師之受業寺。即尾之瑞應無嗣。堂塔屬荒廢。起七十有三老軀。往而修補之。未期月而百廢共舉矣。師雖年既耄。然鑠鑠尙凌壯者。應諸方請。赴戒會者每年兩三回。到處男女群至。被法益者不可勝數。師容貌溫雅。巨懷如海。一拜慈顏者。即頓消煩悶。心胸坦然。誠可謂坐水月道場。修空華萬行者也。師今年七十七。多々益辨。豈爲法門可不欽哉。今焚香稽首。錄師半生梗概。附卷尾云。

明治卅四年孟春之日

參學比丘

紹倫謹誌

空華小錄終

空華小錄終

明治三十四年三月十日印刷
明治三十四年三月十五日出版

非賣品

編輯者兼
行輯者

東京市下谷區谷中坂町廿六番地

大橋春崖

印刷者

東京市神田區淡路町一丁目一番地
日本寫真製版所成章堂

澤村則辰

印刷所


同所

成章堂活版部

213
4

213

4



空華小錄

019412-000-2

213-4

空華小錄

周信/著

M34.3

ABG-0116

